

Karaloukta nütüma

JUDAS

¹Taya, wane nüchepchiakai Jesucristo, Judaskai anülia, nuwalakai Santiago, ashajüshi joo taya jümüin jia eenakuushikana nütüma chi Washikai Maleiwa sümaa alin jia nüpüla, jia aa'inmajuushikana nütüma Jesucristo. ²Achuntüshi joo taya jaa'u nümüin chi Maleiwakai süpüla nümüliajüin jia je süpüla naapüin wane miyo'u anaa jümüin. Kasataalejese jiyaawatüin saa'u sünain shiimüin alin ma'i jia nüpüla Maleiwa.

Süsaleena na ekirajülüikana sünain alawaa saaliijee naainjala

³Tawalayuwaa, jia aishiikana tapüla, kee'ireepü'üsü taa'in tashajeein jümüin süchiki tü o'tte'ennakat anainjee waya. Otta müsia joolu'u, anasü saa'in tamüin teme'ejüle jaa'in süpüla eejiraainjanain jia noulia na ekirajülüikana sünain alawaa süpüla nnojolüinjatüin sümalaja'alaajüin tü jünoulakat nünain Cristo, chi O'tte'ertüikai. Aapünüitpa jümüin tü shiimüinkat nüchikikat, maa aka saapünüin namüin na nüchooinkana Maleiwa napüshua. Jalia jia joolu'u suulia kapülajüin jaa'in eekai waneejatüin suulia. ⁴Ashajüshi

taya jümüin tüü süka süntüitpain ja'akamüin wane ekirajünnüü sünain alawaa. Nnojotsü sütüjaain aa'u wayuu sünain alawaain tü nekirajakat anain. Mojutsai chi Maleiwakai natüma je nnojoshi jamajachin namüin chi Wasenyotsekai Jesucristo, süka nnojolin niain laülaain naa'u saa'in namüin. Nnojoleena süsalain naainjala süka anamiain Maleiwa naajüin. Naa'inrakalaka waneepia kasa mojusü, maa aka a'luwajirawaa akuaippaa sümaa wayuu jierü otta wane jierü nümaa wane toolo. Shiimüin süsaleenain naya tü naa'inrakat nütüma Maleiwa so'uweena wane ka'i, maa aka tü ashajünakat achiki paala.

⁵Anasü saa'in tamüin taso'irüle jaa'in joolu'u sünain nachiki na nüpüshikana Maleiwa wanaa sümaa nojuittinnüin nütüma sulu'ujee tü mmakat Egipto. Aja'ttühii naya nütüma napüshua eekai nnojoliin noonoin sümaa nünüiki. ⁶Akaajaa no'utku na aapiee chaje'ewaliikana eejee Maleiwa, ja'itaina e'itaaushin naya nütüma süpüla laülawaa, nayouktüin tü e'itaanakat apüla naya sümaa no'unüin chajee eepü'üle na'yataain nümüin Maleiwa. Je sükajee tia, nnojoliishii

aawannüin naya nütüma Maleiwa. Nüjünajaain naya chaa wattamüin süpüla püreesainjanain waneepia sa'aka piyuushi wane'ere'eya süntapa tü nakalia süsalaïnjatkat o'u naya.

⁷Akaajaa paala sümaiwa na wayuu yarüttakana aa'in sulujunakana tü pueulokalüürua Sodoma oo'ulaka Gomorra je eekai pejein sü'ütpa'a, kaainjalashii naya waneepia, maa aka a'luwajirawaa akuaiippaa sümaa wayuu jierü otta wane jierü nümaa wane toolo, je maa aka na tooloyuu ama'üjiraakana sümaa tooloyuu. Na'ajüin Maleiwa tia wayuukolüürua süka siki süsala saainjala, süpüla shiyaawatüinjatüin saa'u wayuu kaainjarannuu sünaïn meenain aka naya süsala naainjala süka wane siki matüjainsat oyokujawaa.

⁸Akaajaa na ekerotshiikana jünainmüin sünaïn ekirajaa sünaïn alawaa, sünaïnjee kasa eekai ne'rüin na'lapüinru'u, naapüin ne'iruku süpüla naa'inrüin kasa mojusü yarüttakat atüma naa'in. Nayouktüin chi Senyotkai suulia laülaain nia naa'u otta e'rülüyaain wayumüin namüin na laülaayuuishii chakana iipünaa süka nanüiki. ⁹Otta Miguel sümaiwa paala, mayaainje niain sülaülain tü aapieekalüürua, nnojoishi müin aka naa'in na ekirajülüikana sünaïn alawaa ja'akakana. Wanaa sümaa nü'ülüjaain Miguel nümaa Satanás saa'ujee ni'iruku Moisés: "Nüchiajaajeechi pia Maleiwa", müshi ne'e nüümüin sümaa nnojolin e'rülüyaain wayumüin nia nüümüin süka nüünüiki. ¹⁰Otta na ekirajülüikana sünaïn alawaa, mojusü nanüiki sümüin tü kasa nnojotkat natüjaain aa'u. Müshii

aka naya saa'in mürit sünaïn naa'inrüin ne'e tü nachekakat namüüwa sünaïn nnojolüin jülüjüin naa'in tü naa'inrakat, müleka anale, müleka mojule. Shiimüin sünaïn aja'ttinneenain naya saaliijee tia so'uweena wane ka'i.

¹¹Aisha'ajaa na ekirajülüikana sünaïn alawaa süka kasalajaneerüin namüin tü mojusü naa'inrakat. Nayouktüin Maleiwa maa aka naa'in Caïn paala sümaiwa, chi e'rüikai wayumüin sümüin tü nünoulakat chi nimülüikai. Na ekirajülüikana sünaïn alawaa, kachiirua aa'inchi washirüü, maa aka naa'in Balaam chi nüünüikimaajachikai Maleiwa paala sümaiwa, chi aa'inrakai kasa mojusü shii'iree walaain nüümüin. Je nayouktüin na eekai aneekünüin süpüla laülaain naa'u, maa aka naa'in Coré paala sümaiwa, chi o'utinnakai aa'in saaliijee niyouktüin Moisés süpüla laülaain naa'u. Meena aka naya naa'in Coré sünaïn no'utüüneenain aa'in mapeena.

¹²Mee'erapalashii jia sütüma wayuu, süka maa'in naa'in na ekirajülüikana sünaïn alawaa wanaa sümaa nekaain jümaa tü ekawaa sotiïnjatkat aka jaa'in chi Senyotkai. Je nnojoliishii japülin naya sükajee tia. Naa'inmajeein jia naashin. Na'alain ne'e, shia kapülaka ne'e naa'in nakuaiippa sümüüwa. Je süka nnojolüin pansaain nanüiki, müshii aka naya saa'in wane siruma eekai sülatüin ne'e sümaa nnojolüin sü'itüin tü juyakat sütüma. Je süka nnojolüin jükaaliijünüin süka tü nekirajakat anain, müshii aka naya saa'in wane wunu'u eekai machoin so'u sükalia süpüla kachoinjatüin, tü atu'utünakat süka ouktüütpain shia. ¹³Süka yarüttüin saa'in wayuu müleka

sünoujale tü alawaa nekirajakat, müshii aka naya saa'in tü süshikat palaa sünnain süpütüin kasa wainmaa eekai yarüütüin yaa sotpa'a. Müshii aka naya saa'in awalaasü eekai sülatüin sünnain kettatüin sa'akamüin tü piyuushikat, süka najütüneenain sa'akamüin tü piyuushikat nütüma chi Maleiwakai süsala naainjala.

¹⁴Tü taküjaitpakat jümüin, nüküja achikit Enoc chi nuu'uliwo'ukai Adán maa aka 200 juya süchikijee ouktüin Adán. Müsü nünüiki Enoc:

“Shiimüin sünnain nüntajacheechin chi Maleiwakai sünnain eenjaneenain watta naalin na aapieekana nümaa, na akataluushikana nütüma.

¹⁵Iseeichi nia süpüla kasalajaneerüin sümüin saainjala wayuu süpüshua nütüma.

Na wayuu kaainjaraliikana, na mojutkana atüma Maleiwa, nayaawateerü aa'u so'uweena ka'ikat tia sünnain e'rülüin ma'i naya wayümüin nümüin otta sünnain mojushaatain ma'i nanüiki nümüin”.

¹⁶Na ekirajülüikana sünnain alawaa, saa'u nnojolüin talatüin naya sümaa tü naa'inrakat Maleiwa, keke'eralii naya nümüin. Naa'inrüin waneepia tü kasa mojusü nachekakat ne'e namüiwa sümaa na'waataain sulu'u. Müleka kamaneere naya sümüin wane wayuu, süpülatatü ne'e nakaaliijünüin nayakana namüiwa sükajee tia.

**Kaaliijiraainjana napüla
na nawalayuukana**

¹⁷Otta müsia tawalayuwaa, soto jaa'in tü naküjapü'ükat achiki paalainka sümüin wayuu

na Aluwataaushikana nütüma chi Wasenyotsekai Jesucristo, sünnain naapirüin shia soo'opünaa tü alatajateetkat so'uweena wane ka'i. ¹⁸Mapü'üsü nanüiki: “So'uweena wane ka'i pejepa süpüla niitaainjachin Cristo, wainmeerü wayuu eekai kale'eru'uin süchiki kaainjalaa. Neme'erainpaleena jia saaliijee tü jünoulakat”. ¹⁹Shia nachiki na antakana ja'akamüin maa'ulu yaa. Naa'inrüin ne'e tü nachekakat namüiwa, süka nnojolin ein chi Naa'inkai Maleiwa sulu'u naa'in. Je jia anoujashiikana, nnojoliinapakalaka paa'inwain jia sünnain anoujaa sütüma tü nekirajakat anain.

²⁰Otta müsia tawalayuwaa, anakaja müleka ayatüle jia sünnain ekirajaa tü shiimüinkat süpüla jükaaliijiraain sünnain koo'omüinjatüin jümüin sütsüin jaa'in sünnain anoujaa. Je saa'u ein chi Naa'inkai Maleiwa sulu'u jaa'in, anakaja jüüjüüle jia nümüin süpüla juuntüin achuntaa nümüin Maleiwa. ²¹Iche jia nünain Cristo süpüla jiyaawatüinjatüin waneepia jaalin nüpüla Maleiwa. Je saa'u nümüliajüinapain jia chi Wasenyotsekai Jesucristo, anakaja jüchecherüle jaa'in süma'inru'u ja'atapajüin nikeraajüin tü naa'inrakat süpüla eenjanain jia nümaa süpüla ka'ikat süpüshua.

²²Anakaja müleka jümüliarüle na juwalayuukana eekai matsüin aa'in sünnain anoujaa süpüla katsüinjatüin naa'in. ²³Je müleka eere ja'aka eekai kale'eru'uin süchiki kaainjalaa, anakaja müleka jüchiajaale nia suulia tia süpüla nnojolinjachin süsala nia nütüma Maleiwa süka tü siki matüjainkat

oyokujawaa. Jükaaliija jümaala
na juwalayuukana napüshua eekai
kaainjalain süpüla najuittünjanain
suulia. Otta jalia jia yarüttajayaa
aa'in sütüma tü kasa mojúshaatakat
naa'inrakat.

Wane pütchi a'waajia chi Maleiwakai

²⁴Achuntüshi taya jaa'u joolu'u
nümüin chi Maleiwakai süka niain
aa'inmajüin jia suulia ojutuwaa.
Nia aa'inmajaka jia süpüla
jüsha'walaajeenain nü'ütpa'a
so'uweena wane ka'i sünain lotüin

jukuaippa no'ulu'u. Talataleejeeria
ma'i jaa'in so'u ka'ikat tia, süka
anashaateechin ma'i nia ji'rüin.

²⁵Anakaja joolu'u wa'waajüle
chi Maleiwa waneeshikai ma'i
sünain o'tte'erüin waya sünainjee
tü naa'inrakat chi Wasenyotsekai
Jesucristo. Kojutuleeshia ma'i
chi Maleiwakai watüma süka
pülashin ma'i nia sünain
aluwatawaa maa'ulu yaa, maa aka
nuluwataapü'üin paala sümaiwa je
maa aka nuluwataajeechin süpüla
ka'ikat süpüshua. Amén.